

四

明

叢書

張宗祥



00  
2  
10

雲濠謹案黃文獻誌先生墓言其弱冠游京師或  
介以謁趙文敏公又因文敏徧游大人先生之門  
以薦補國子學生一  
時名師儒皆大奇之

補  
饒先生敬仲

附錄

虞道園序其詩曰敬仲遺予五言長詩凡百韻陳義之  
大論事之遠引援乎往昔聖賢之業鋪張乎一代文章  
之體縱橫開合動蕩變化可喜可駭可感可歎及觀其他  
作往往不異乎此而此千言者尤足肆其馳騁云嘗著  
書一編述山水之情性臨川亟稱之首爲之序以傳于

世

縣尹虞先生槃

虞槃字仲常伯生之弟也延祐五年第進士授吉安永豐丞除湘鄉州判官秩滿除嘉魚縣尹卒先生幼時嘗讀柳子厚非國語以爲國語誠可非而柳子之說亦非也著非非國語時人已歎其有識詩書春秋皆有論著而春秋乃其家學故尤善讀吳草廬所解諸經義輒得其旨趣所在草廬亟稱之

元史

仲常遺文

學者敏于修而已敏于修則體無不具而用無不周其亦有外此而可以言學者乎孟子曰聖人百世之師也伯夷柳下惠是也伯夷柳下惠無以異于眾人也而可以爲百世之師者何哉修其身而已耳

蔡君字說

### 附錄

道園誌其墓曰于詩于書考諸傳注常病其傳襲爲說而無以知古昔之意皆定著其說凡數十篇其學尤粹于春秋以爲諸傳不足以得聖人之旨亦別著爲書尤病左氏之夸于辭而謬于實也遂并史漢之謬而論之

梓材謹案道園所作誌文有云至撫之崇仁先君有友曰吳公澄幼清氏先夫人曰此大儒非常人比故我兄弟雖學于家庭而仲常常深究力攷已爲吳公所知據此似先生特草廬私淑弟子而萬姓統譜以爲同遊草廬之門

皮時中先生濛 附子霖

皮濛字以亨平江判官昭德之弟也嘗築別室里第之南數十步堂成求名於草廬乃題其堂曰時中又爲之辭焉後數年先生卒又數年堂燬而辭亦亡其子霖思先人之遺意更卜構堂仍其舊名請道園以意申之 道園

學古錄

解山泉先生蒙

解蒙字求我吉水人與兄觀我治易有名江鄉閒先生  
著有易經精蘊季通亦其兄弟也有易義

經義考

易精蘊大義

頤養之道以安靜爲無失二三動體故顛拂而凶四五  
靜體故顛拂亦吉震三爻凶艮三爻吉可見

頤六三

恆有二義利貞者不易之恆所以體常利有攸往者不  
己之恆所以盡變天地聖人所以能恆者以其能盡變  
也

恆象

梓材謹案春兩學士表劉章江墓云縉之家學傳于東山楊先生靜春劉先生四傳而至季大父伯中先生觀仲正先生蒙又講于吳文正公慨然有得精思力踐所至門人弟子麀至而從之乃建學舍于里東山之下四方之人畢集焉據此則先生亦在草廬之門矣

梓材又案先生字求我江西通志作字來我以字形相近而誤一字仲正蓋亦吳文正所更號山泉先生見學士送姚大同歸襄陽序四庫書目著錄易精蘊大義十二卷永樂大典本

### 平章董先生士選

董士選字舜卿棗城人忠獻文炳次子也幼從父居兵閒晝治武事夜讀書不輟宋平班師詔置侍衛親軍諸衛以先生爲前衛指揮使號令明正得士大夫心未幾

以其職讓弟帝以先生同僉行樞密院事于湖廣久之  
召還歷爲江浙行省右丞遷汴梁行省平章政事又遷  
陝西先生平生以忠義自許尤號廉介自門生部曲無  
敢持一毫獻者治家甚嚴而孝弟尤篤時言世家有禮  
法者必歸之董氏其禮敬賢士尤至在江西以屬掾元  
明善爲賓友旣又得吳草廬而師之諸老儒及西蜀遺  
士皆以書院之祿起之使以所學教授晚年好讀易潛  
然終其身

元史

學士曾滄海先生堅



曾堅字子白臨川人其族分自南豐父祖皆宋進士書  
詩之業遠有端緒先生既承家庭之訓又出從元夫鉅  
儒游鑽研六經孳孳惟恐弗力聞吳文正公講學華蓋  
山裹糧往叩之胸中疑難一旦冰釋後擢進士助教國  
子修撰翰林出任江西行省郎官入成均爲丞遂升司  
業進詳定副使拜監察御史已而復爲副使改翰林直  
學士而卒其文刻意以文定爲師宋潛溪序其文集稱  
其剛明正直政事多可書云

宋文憲集

梓材謹案先生嘗爲舒文靖公墓田記又序薛毅  
夫四明洞天丹山圖詠集自稱滄海逸史臨川曾

堅序有云余再以使事航海出慶元洋故得爲文靖墓田記也經義考有曾氏堅詩疑大鳴錄一卷黃氏千頃堂書目以爲吳江人仕元爲禮部員外郎徐達克元都同學士危素等出謁軍門太祖仍命原官後洪武初歷官雲南左布政使至宣德時尙存蓋與先生同姓名者非一人也

儀司曾先生塾

曾先生欽

合傳

蕭先生泉

合傳

州同黃先生常

合傳

曾塾樂安人因游京師蒙古國子監以弟坦長其地充侍儀司之屬嘗與兄之子欽及里中士蕭泉將同知未

陽州事黃常皆及草廬之門

文正文集

鄉貢吳先生尙志

周先生濂

合傳

吳尙志盱江人草廬禮記纂言彙成請鉸木遂與草廬之甥周濂集同門之士相與成之

禮記纂言跋

梓材謹案吳先生與朱禮德嘉並盱之鄉貢進士蓋德嘉以詩舉而先生以禮舉也虞道園送以序云聖人之教其子也學詩學禮而已爾集是以命弟子學詩于德嘉矣然則學禮者其將求之于尙志乎

王先生子清

王子清字寅叔金陵人皇慶初吳草廬以疾尋醫過金陵先生授之館執弟子禮而請學焉草廬稱其爲學不卑卑于世儒記誦詞章之習上慕古之聖人賢人而爲師可謂特見卓識而不得年以死是可慨也

吳文正集

參政蘇滋溪先生天爵

詳見靜修學案

參政周堅白先生伯琦

周伯琦字伯溫饒州人自幼從父待制應極宦遊京師入國學爲上舍生積分及高等去以蔭授將仕郎南海縣主簿三轉爲翰林修撰改宣文閣授經郎教戚里大

臣子弟每進講輒稱旨帝以先生工書法命篆宣文閣寶仍題扁宣文閣及摹王羲之所書蘭亭序智永所書千文刻石閣中嘗呼其字伯溫而不名會御史奏風憲宜用近臣特命僉廣東廉訪司事八年召入爲翰林待制累陞直學士除兵部侍郎與貢師泰同擢監察御史兩人皆南士之望一時榮之遷崇文太監兼經筵官出爲江東肅政廉訪使長槍鎖南班陷寧國先生與僚佐倉皇出走至杭州除兵部尙書改浙西肅政廉訪使丞相達識帖睦爾承制假參知政事招諭平江張士誠留

平江者十餘年士誠旣滅乃歸鄱陽尋卒先生博學工  
文章而尤以篆隸眞草擅名當時嘗著六書正譌說文  
字原二書又有詩文彙若干卷

元史

梓材謹案先生所著名堅白居士集亦名近光扈  
從集宋潛溪誌其墓云補國子生事吳文正公鄧  
文肅公虞文靖公于司業博士座下作野菊賦元  
文敏公稱之輒有名又云僉廣東廉訪薦處士陳  
明等六人于朝建豐湖白鶴二書院以祀蘇文忠  
公軾羅文質從彥拜監察御史薦中外官一百二  
十七人舉士二十五人蹇蹇不阿大臣皆嚴憚之  
雲濠謹案四庫著錄先生說文字原一卷六書正  
譌五卷提要云是二書前有宇文公諒總序說文  
字原之首有自序又言此二書推衍說文者半參  
以己見者亦半瑕瑜互見通蔽相仍不及張有復  
古編之精密而亦不至如楊桓六書統之淺雜又

云明郎瑛七修類稿載其降于張士誠士誠破後  
爲明太祖所誅謂元史稱其後歸鄱陽病卒爲誤  
然宋濂修史在太祖時使其果與士誠之黨  
同誅濂等不容不知瑛所言殆傳聞失實也

陳先生禧

陳禧□□人著有周易略例補釋一卷草廬序之曰禧  
年甚少而篤志于經世武功而從事于文諸侯之子而  
齒于庶士以共學是其天質之異于人者也

經義考

張先生恆

張恆汝南人臨川吳草廬弟子善談名理

宋文憲集

梓材謹案先生爲草廬孝經章句後序稱草廬南  
還次廣陵郡子訪道誼經者日至恆往受業焉序

文甚詳  
不具載

陳先生姪

陳姪字伯高口口人生長素封之家而無膏粱紉綺之態既成童詣草廬讀書草廬每日談辨從旁竊聽悉能悟解卒年十九

吳文正集

曾先生仁

曾仁草廬學者元統元年草廬疾作召之曰生死常事耳須使吾子孫知之

文正年譜

山長康先生震



康震字宗武泰和人嘗從吳草廬劉申齋學草廬孫湖廣左承當薦爲慶陽書院山長秩滿當遷以親老歸作莊山書院招延學者館教之有思治集藏于家

吉安府志

教授吳平齋先生皋

吳皋字舜舉臨川人宋履齋丞相六世孫早師草廬得爲學之要文章森嚴有法教授臨江遂占籍焉號平齋有吾吾齋類稿

撫州府志

柳先生從龍

柳從龍字雲卿九江人志行卓然年長于草廬而學于